

## NWAR COUME IN TCHERBOUNI AL FÂDE.



Câzer du mêtî d' fâdeu et d' sa fâde n' est nin si âji k' ça.

La fâde, c'est coume èn afant. On n' put nin la lêchi à lie-minme ;  
i fât yèsse dulé nute et djoû.

Ene fâde, c'est bê, mès i fât la fwêre et l' aturtunu et surtout la  
rèyussi ; vous n'astèz nin sins sawè k' ène fâde est fwête pou  
brûler dou bwès, à kwète du l'êr, bin raclôs, pou ku l'bwés duvinje  
du tchèrbon et apêtchi k'i n' prinje feu.

Du tchèrbon d'bwès, ki n' dot nin vnu à bréjes non pus !

Coumint k'on s'î prind ?

Onz' atake pa nètiyî, lâdje coume ène grègne et co d'pus, la place  
k'on vut la fwêre, bin plate sins lêchi des broustons, des cayôs et  
des wazons pa ttavâ, ka i va falu rustuler bin prope après les kékes  
djoûs d' ovradge k'i fârè pou mon.ner à bin nosse coûtée.

Lu fâdeu fwêt talantout in fossé pou tnu la fâde bin sètche. I pût  
ossi z'an'alver in pö l'nivô.



Construction de la fâde de bois dans la forêt. Photographie d'après [?]

An plin mitan et à grands côps d' masse, lu mwêsse-tchèrbouni aforce adon 3 pikèts, yinke dulé l'ôte à triangué pou fwêre coume ène tchuminée. C'est par là k'on mètrè lu feu l'fâde, avu du bwès ki prind l' pus vite.

On wête ossi du n'nin awè des bwès trop gros ki n'srint nin percés cand les ôtes srint djà à l'état d'bréjes.

Adon, i gn'è pus k'à tchèryî al berwète les chêdes du bwès rufindues et d' les camper, aspoiyés su les pikets, al z'î dnant in pô du pîd vè l'mitan et insi d'ner sa forme al fâde. Ile va rсан.ner à ène molinée, mès an bin pus grand.

In côp l' prêmî lit du rondins bin avançî, on campe dussus in deujime lit du pus gros bwès, pîs su ç'ti-ci, in trwâjime et pa des côps in katrime, si la fâde est fwârt grosse.

Tout ça fini, à s' siêrvant d'ène chôle pôsée su la fâde, on la covure du mî k'on put avu foyes, des wazons, dul tère et les dêbris dul fâde du dvant, pou l' bwès su consume sins êr, sauf k'on lêche à ras d' tère kékes bawêtes pou fwêre du tiradje à l'alumadje.

Cand la fâde est bin prête, on prind kékes sayês de çades toutes roudjes, vunant d'èn feu vèjin et on les voude pal tchuminée du mitan pou dêmarer l'feu.

Cand ç'ti-ci è bin pris, on bouche la tchminée avu des gros wazons, du minme ku les bawêtes du tour. Et insi lu feu continue à brûler sins flames, à tchandjant lu bwès an tchèrbon.


La fâde est yâk ki vike. Rin k'à la vèy, lu tchèrbounî sèt ç'ki dot fwêre.

S' ile s'afale d'in costé, c'est ku l' calcinage va trop vite à ç' place-là.

Adon, vite bouchî les trôs ki fumât et z'à fwêre des ptits du l'ôte costé pou rêtâbli l'èkilibe.

I fât compter kékes djoûs pouz ariver à ses fins. Et c'est cillé ku la paciance du tchêrbounî est mêtuwe à rude épreuve.

Cand onz è covru la fâde du mî k'on è polu, il arive souvint k' à brûlant, si ène coche bouje in pô, ile antrin.ne les cies dà costé,



les wazons su dêplaçat et vlà in trô al fâde et c'est assez pou la rater.

I convint don d'esse su place pou rarandjî la coviête et çà, nute et djoû. I fât ossi compter avu l'vant. S'i dvint trop fwârt, on dresse des clôyes du gnêsses pou l'tampèrer.

La fâde an plin.ne buzougne dègadje ène blantche fumîre, ki dvint pus brune cand lu coujadje arive à sa fin. Fwête dul séve du bwès ki s'èvapore, ile est crâsse et cole às habîmints, cè ki les rind nwârs et rloujants. Pîs, tout douc'mint, ou dbout d'kékes djôus, la fâde s'afale su lîe-minme, moustrant par là k'il est timps d' dusfourner.

On dovure la fâde d'in costé pou la lèchî rafrèdi et cand c'est fwêt, on cmince à ramasser les çades frêdes. On prind pou ça la fon.ne à boules, à 10 dints, ki siève pou les canadas et k'on cheut pour lijî l' pus bê. On mèt l'tchêrbon à satchs et la berwète est toudis là pou transbahuter jusk' à l'tchêrète ki les va ramon.ner al mâjon û don bin vè la fondrie.

Les rbuts ,la tère et les wazons ki dmérat sont mêtus d' costé pou covru la fâde ki chûrè. Ca, si l'bwès est bin fourni, on put fwère kékes fâdes yène durî l'ôte , û 2-3 assan.ne, s'i gn'è du monde. C'est pou ça k'on put co vèy anute, dins certins tchamps, des grands ronds du nwâre tère ki markat la place des faudes.

C'est à pô près tout c'k'i dmère des fâdes du dinltins.

-----

Gn'avot às Hauts-Bûtês dulé Monthermé, èyû k'on va à St Antwane, lu seul fâdeu ki dmèrot sul pays après-guère. Ç'ére « Agapit ».

Les djins d'âdje duvat s'a souvnu ; il avot in solé avu ène fwârt supèsse sumèle, cè ki l'êdot à router.

Ça n' l'è n in apêchî du fwère lu sacristin « às Butês » et alumer les boujies dèrant mwintes annéyes, avu in costume bin prope. C'ééré lon du l'uniforme du smwin.ne du fâdeu, vous savèz bin ; i s'tunot drèt tout seu,

NWAR COUME IN TCHERBOUNI !

On l'inmot bin, « Agapit » !

Louwis Baidjot, Graide 28/01/2012.